



Inatsisartunut ilaasortaq Erik Jensen, Siumut
Maani/

§ 37 naapertorlugu apeqqutip nr. 101-ip akineqarnera

Inatsisartut Suleriaasianni § 37, imm. 1 naapertorlugu Kitaani qalerallinnik avataasiortunik tulaassisussaataaneq pillugu Naalakkersuisunut apeqqutininik saqqummiussaqaqputit. Apeqqut suliaasaqarfignannit akineqartussanngorlugu innersuunneqarpoq.

Apeqqutigineqartoq:

1. Avataasiortunut qalerallitassiissutit qaffaassutaat 2019-imi aaliangerneqarsimasoq aallaavigalugu, illoqarfinnut sorlernut tulaassisussaataaneq aaliangerneqarpa?

Pillugu. 1

Ukiuni arlaqalersuni qalerallit avataasiortut Kitaata kujataaniittut Kitaatalu avannaaniittut 25 %-inik ataatsimut tulaassisussaataaneq atorneqarpoq.

Kitaata kujataani Kitaatalu avannaani qalerallinnut avataasiortunut uumassusilerinikkut siunnersuineri tamarmiusuni pisarineqartussat 2019-imi 4.070 tonsinik ilanearput. Qaleralatigiit avataasiortut Kitaaniittut Kalaallit Nunaata Canadallu akornanni avinneqartarput. Taamaasilluni kalaallit imartaannut siunnersuinerit 2019-imi 2.035 tonsinik ilanearput. Siunnersuutigineqartut amerlanerummata taamanikkut Naalakkersuisuusooq aalajangerpoq Royal Greenland A/S 1.500 tonsinik 100%-imik nunamut tulaanneqartartussanik tunineqassasoq.

Royal Greenland A/S-ip Kalaallit Nunaata avannaata kitaani avataasiortunik qalerallitassai 1.500 tonsiusut 100%-imik nunamut tulaanneqartussaataareerput. Taamaasilluni ingerlatseqatigiiffiup qalerallitassai 100 %-imik nunamut tulaanneqartussaataasut 3.000 tonsiulerlutik. Royal Greenland A/S-ip 2019-imi qalerallitassai 100 %-imik nunamut tulaanneqartussaataasut illoqarfinnut ukununga agguarneqarsimapput:

- Kalaallit Nunaata Kitaata Avannaani 1.000 tonsit 100 %-imik Maniitsumut tulaanneqartussat
- Kalaallit Nunaata Kitaata Avannaani 500 tonsit 100 %-imik Qasigiannuanut tulaanneqartussat
- Kalaallit Nunaata Kitaata Avannaani 750 tonsit 100 %-imik Kangaatsiamut Qasigiannuanulluunniit tulaanneqartussat.
- Davisip Ikersuani 750 tonsit 100%-imik Paamiunut tulaanneqartussat

Avataasiortunik pisassiissutinik agguanermit 2021-mi naalakkersuisuusimasut aalajangerpaat, pisassiivimmi avannaani tulaassassat 750 tonsit Kangaatsiamut tulaanneqassasut.

2. Tulaassisussaataanermit qassi tons illoqarfinnut sorlernut tulaattussanngortinneqarpat?

Ulloq: 13-08-2021
Suliap normua: 2021 - 14150
All. nr. 17580182
Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-maili: apn@nanoq.gl
www.naalakkersuisut.gl

Pillugu. 2)

Apeqqu 1-imut akissut takuuk.

3. Illoqarfinni sorlarni piumasaaqatit eqquutsinneqarpat?**Pillugu. 3)**

Royal Greenland A/S -ip Kalaallit Nunaata Kitaata Avannaani Kitaata Kujataanilu 2019-imi avataasiorluni qalerallittassai tamakkerlutik 4.750 tonsiusimapput. Taakkunannga 3.000 tonsit 100 %-imik nunamut tulaanneqartussaataasimallutik. Sinneruttut 1.750 tonsiusut 25 %-ii nunamut tulaanneqartussaataaallutik. Taamaasilluni Royal Greenland A/S-ip Kalaallit Nunaata kitaata avataani qalerallittassaanit nunamut tulaanneqartussaataasut 3.437,5 tonsiusimapput.

Kisitsisitigut paasissutissat ataaniittuni takuneqarsinnaasutut Royal Greenland A/S-ip 2019-imi katillugit 3.493 tonsit tulaasimavai. Taamaasilluni Royal Greenland A/S-ip tulaanneqartussaataasunit amerlanerit nunamut tulaasimavai. Taamaattoq oqaatigineqassaaq Paamiunut tulaanneqartussaataasut 2019-imi 750 tonsiummata. Royal Greenland A/S-ip 2019-imi 726 tonsit tulaasimavai, taamaasillunilu Paamiunut tulaanneqartussaataasut 24 tonsinik inorlugit tulaanneqarsimallutik.

Royal Greenland A/S-ip avataasiorluni qalerallittanit tulaassai*

	2019 (tonsit)	2020 (tonsit)
Maniitsoq	1.475	791
Qasigiannugit	1.292	1.031
Kangaatsiaq	0	0
Paamiut	726	141
Katillugit	3.493	1.963

*Paasissutissat Royal Greenland A/S

2020 ukiuuvuq immikkut ittoq COVID-19 pissutaalluni. Nappaalanersuup kingunerisaanik aalisarnermik inuussutissarsiuteqartut immikkut unammilligassaqaqfigisimasaat pingaartumik qalerallinnit tunisassiat siusinnerusukkut tunitsiviusarsimasunut tuniarneqartarneri eqqarsaatigalugit. Qalerallit nerpii tuniarneqaraangamik niuffaffinni immikkoortumi nerisassanut kiffartuussinerni (foodservice-mi) inissisimasartut (neriniartarfinnut, nerisarfinnut il.il.tunisat,) COVID-19-imit immikkut eqqorneqarsimapput.

Akileraarutitigut akitsuutitigullu isertinneqartartut annertuumik ikileriarnissaat pinngitsoorniarlugu taamanikkut Naalakkersuisuusut aprillip 30-iani 2020 aalajangerput Kalaallit Nunaata Kitaani avataasiorluni qalerallittassat nunamut tulaanneqartussaataasut affaat atorunnaarsinneqassasut. Pissutsit taamaaginnarmata taamanikkut Naalakkersuisuusut oktoberip tallimaani 2020 aalajangerput Kalaallit Nunaata kitaani avataasiorluni qalerallittassat nunamut tulaanneqartussaataasut tamakkerlugit atorunnaarsinneqassasut.

Kalaallit Nunaata kitaani avataasiorluni qalerallittassat nunamut tulaanneqartussaataasut tamakkerlugit atorunnaarsinneqaraluartut Royal Greenland A/S nammineerluni aalajangersimavoq 2020-mi katillugit 1.963 tonsit tulaanneqassasut.

4. Inoqarfinni sorlarni tulaassisusaataaneq naammassineqarsimava?**Pillugu. 4)**

Apeqqu 3-mut akissut takuuk.

5. Inoqarfinnut amerlanerpaanut pisuussutit iluaqutaanissaat Naalakkersuisut qulakkeersimavaat?

Pillugu. 5)

Kalaallit Nunaata Kitaani avataasiorluni qalerallitassat 25%-iisa nunamut tulaanneqartarnissaanut siunertarineqartoq tassaavoq nunami suliffissat qulakkeerneqarnissaat. Kalaallit Nunaatali kitaani qalerallitassatut siunnersuutigineqartut 2019-imi amerleriangaaitsiarmata taamanikkut Naalakkersuisuusut aalajangerput tulaanneqartussaataitasut 100%-inngortinneqassasut. Illoqarfinni tulaassuiffigineqartartuni aalajaatsunik suliffissaqarnissap qulakkeerneqarnissaa siunertaasimavoq. Illoqarfinni tulaassisussaaffiusuni suliffissuit piffissami sivilunerusumi suliffissaqartitsiniarnissaminnut pilersaarusiorsinnannissat taamaasiornikkut periarfissinneqarpoq.

6. Naalakkersuisut allanik paasissutissaasinnaasunik peqarpat?

Pillugu. 6)

Kalaallit Nunaata Kitaani avataasiorluni qalerallitassat ukiakkuunerusoq aalisarneqartarput aalisakkallu upernaakut ukiakkullu aalisakkanik tunisassiorfinni tunisassiarineqartarlutik tassa ulapputissaqarnerpaaffiup avataani. Aalisakkat suliffissuarmut oqqunneqarnerisigut tulaassineq aatsaat pisarpoq. Taamaattumik aalisakkat aalisarneqarnerinit aalisakkanik suliffissuarni tulaanneqarnissanut piffissaq sivilisooq ingerlasinnaasarpoq. Taamaattumik qalerallit ilaat ukiumi aalajangersimasumi aalisarneqartut ukiup tulliani tulaanneqarsinnaasarput. Suliamili uani pingaarnertut oqaatigineqarsinnaasoq tassaavoq nunamut tulaanneqartussaataitasut tulaanneqartartullu nikinganeq ajormata.

Inussiarnersumik inuulluaqqusillunga

Aqqaluaq B. Egede

Aalisarnermut Piniarnermullu Naalakkersuisoq